

CONVENIO DE COLABORACIÓN ENTRE O INSTITUTO GALEGO DO CONSUMO E DA COMPETENCIA E A FEDERACIÓN GALEGA DE MUNICIPIOS E PROVINCIAS PARA REFORZO DA OFICINA DE CONSUMO COA QUE CONTA A FEGAMP EN MATERIA DE COMERCIALIZACION ELÉCTRICA , BONO SOCIAL E PROBLEMÁTICA DO COMERCIO ELECTRÓNICO AOS CONCELLOS

En Santiago de Compostela, 19 de outubro de 2018.

DUNHA PARTE: Instituto Galego do Consumo e da Competencia (en adiante IGCC), e no seu nome, a súa directora , , actuando no exercicio do seu cargo e en función das atribucións que lle confire o artigo 13 dos estatutos do IGCC publicados mediante Decreto 118/2016, do 4 de agosto, polo que se crea o Instituto Galego do Consumo e da Competencia (DOG nº 160, do 25 de agosto de 2016) , e o artigo 1 da Resolución do 23 de marzo de 2017 sobre delegación de competencias en diversos órganos deste instituto (DOG nº 74, do 18 de abril de 2017) .

E DOUTRA A FEDERACIÓN GALEGA DE MUNICIPIOS E PROVINCIAS (en adiante FEGAMP) e no seu nome e representación, o seu presidente, que actúa en virtude das competencias contidas no artigo 46.1.b) dos Estatutos da Federación Galega de Municipios e Provincias, aprobados en asemblea ordinaria do 4 de decembro de 2003.

Ambos os dous comparecentes recoñécense capacidade xurídica abondo, subscriben en nome das respectivas entidades este convenio e para o efecto,

EXPÕÑEN :

Primeiro.- Que o IGCC é un organismo autónomo adscrito organicamente á Consellería de Economía, Emprego e Industria que, de acordo co Decreto 118/2016, do 4 de agosto, desenvolve unha ampla gama de fins relativos á defensa, promoción e información, e en definitiva, á protección do consumidor e usuario, de acordo co establecido no Estatuto de Autonomía de Galicia e a disposición adicional segunda da Lei 2/2012, do 28 de marzo, de protección das persoas consumidoras e usuarias. Entre os mencionados fins, atópase o de cooperación con outras entidades para a persecución dos obxectivos que lle son propios.

Segundo.- Que a Federación Galega de Municipios e Provincias (FEGAMP en adiante) é a única entidade asociativa das entidades locais de ámbito autonómico e, de conformidade co establecido na disposición transitoria terceira da Lei 5/1997, do 22 de xullo, de Administración Local de Galicia, está recoñecida polas entidades locais galegas como a entidade asociativa máis representativa e maioritaria e terá as facultades derivadas da súa representatividade, constituíndo un excelente marco para realizar a difusión, coordinación e execución de determinadas programacións nos concellos e provincias ás que representa.

Terceiro.- Que na actualidade , tanto as dúbidas e consultas como o número de reclamacións das persoas consumidoras, entre os que se atopan os propios concellos, en referencia ós problemas relacionados coa tarificación eléctrica , bono social e comercio electrónico veuse incrementado de forma notoria , tanto a nivel nacional como a nivel da nosa Comunidade Autónoma como consecuencia de continuos cambios normativos e cambios na maneira na que se configuran os prezos no ámbito da enerxía eléctrica e no caso do comercio electrónico a proliferación de inseguridade e fraudes na compra por Internet . Isto xera confusión e opacidade o que pode ir en contra dos intereses económicos dos concellos e polo tanto dos propios veciños e veciñas.

O Instituto Galego do Consumo e da Competencia considera que concorren na sinatura deste convenio razóns de interese público xa que se está a impulsar a realización de actividades de interese xeral en materia de comercialización eléctrica e comercio electrónico, contribuíndo á posta en marcha de actuacións para alcanzar unha resolución das dúbidas, consultas e reclamacións dos concellos de Galicia dunha forma máis eficaz e áxil e lograr maiores cotas de aforro enerxético, aforro económico e evitar problemas que deixen ás persoas consumidoras nunha posición de indefensión.

Cuarto.- De conformidade coas consideracións anteriormente expostas dáselle cumprimento ás esixencias previstas nos artigos 19.4.c) e 26.2 da Lei 9/2007, do 13 de xuño, de subvencións de Galicia, non resultando posible promover a concorrência en base á especificidade da FEGAMP que, de acordo cos seus fins estatutarios, desenvolverá actuacións de promoción, representación e defensa dos intereses das entidades locais de Galicia ante outras administracións públicas, figurando dentro das súas funcións, a constitución de servizos de asesoramento e asistencia para os seus membros e considerando, ademais, as características das actividades obxecto deste convenio, actividades que só a FEGAMP pode realizar tendo en conta o antedito recoñecemento como entidade máis representativa das entidades locais galegas.

Ao abeiro do exposto e coa finalidade de levar a cabo as actuacións de conformidade co obxectivo previsto, as partes asinantes acordan formalizar o convenio marco de colaboración con suxeición ás seguintes,

CLÁUSULAS

Primeira.- Obxecto.

O obxecto do convenio é establecer as bases de colaboración entre o IGCC e a FEGAMP para que esta preste o apoio e asesoramento aos concellos de Galicia en materia de comercialización de enerxía eléctrica, bono social e a súa complexidade

actual e ó mesmo tempo todos os aspectos que afecten ou teñan relación coa problemática no comercio electrónico a través do reforzo da oficina de atención ao consumidor coa que conta a FEGAMP.

A estes efectos, o artigo 5.2 da Lei2/2012, do 28 de marzo, galega de protección xeral das persoas consumidoras e usuarias establece que as administracións públicas só serán consideradas como consumidor cando, estando nesta posición, actúen no marco da contratación privada e non no ámbito de contratos administrativos.

Segunda.- Financiamento.

Para o desenvolvemento do obxecto do convenio o IGCC destinará a cantidade total de 11.000 euros con cargo a aplicación orzamentaria 09.80.613A.460.0 do seu orzamento de gastos para o ano 2018

Esta achega económica terá como finalidade o reforzo da oficina de consumo da FEGAMP para a prestación do servizo de apoio e asesoramento en materia de comercialización eléctrica, bono social e a súa complexidade actual e problemática no comercio electrónico por parte da FEGAMP, aos concellos de Galicia.

O pagamento desta achega realizarase logo da xustificación dos gastos nos termos sinalados na cláusula oitava.

Esta axuda será compatible con subvencións ou axudas doutras administracións públicas ou doutros entes públicos ou privados, nacionais ou internacionais, de maneira que, en ningún caso, o seu importe sexa de tal contía que, illadamente ou en concorrencia, supere o custo da actividade subvencionada.

Terceira.- Compromisos do Instituto Galego do Consumo e da Competencia.

O compromiso do IGCC, neste convenio, límitase a facer a achega dos fondos públicos para o reforzo da oficina de consumo coa que conta a FEGAMP a cambio do desenvolvemento do mesmo pola FEGAMP nas que está presente un interese

público como é impulsar a realización de actividades de interese xeral en materia de consumo eléctrico, bono social e a súa complexidade actual e problemática no comercio electrónico contribuíndo a unha resolución das reclamacións dos concellos de Galicia dunha forma máis eficaz e áxil.

Cuarta.- Compromisos e obrigas asumidos pola Federación Galega de Municipios e Provincias.

A FEGAMP comprométese a poñer a disposición dos concellos de Galicia a súa infraestrutura, medios materiais e humanos, organización e capacidade de xestión para acadar o obxectivo do convenio.

No marco deste convenio, en relación cos concellos asumirá como mínimo, os compromisos e obrigas de:

- Recepción das peticións de asesoramento que realicen os concellos en materia de comercialización eléctrica, bono social e a súa complexidade actual e problemática no comercio electrónico
- Recepción de reclamacións en materia de comercialización eléctrica, bono social e a súa complexidade actual e problemática no comercio electrónico e posterior e detección de posibles irregularidades, facilitando a concreción das súas pretensións .
- Mediación en todas aquelas reclamacións nas que se aprecien irregularidades para a súa resolución e no caso de non prosperar esta, ofertar a vía da arbitrase de consumo.
- Tramitación das reclamacións non resoltas tras a celebración da mediación ao IGCC.
- Reforzo da oficina de atención ao consumidor da FEGAMP coa prestación do servizo de apoio e asesoramento que contará como mínimo cunha persoa titulada universitaria de Licenciatura ou título equivalente expedido por un centro de ensinanza superior con cargo á achega económica recollida neste convenio.

- Elaboración dunha base de datos de todos os Concellos de Galicia que conten cunha OMIC. En dita base de datos figurarán os datos identificativos (Concello, dirección, teléfono, persoa de contacto, correo electrónico,...) da OMIC a efectos de posibles comunicacións ou xestións que se teñan que levar a cabo por mor deste convenio.
- En xeral, as previstas no artigo 11 da Lei 9/2007, do 13 de xuño, de subvencións de Galicia.

Para a realización de todas estas actuacións especificadas nesta cláusula cuarta do convenio a FEGAMP poderá pedir a información necesaria e apoio ao IGCC co fin de que ditas actuacións se leven a cabo da cordo coa lexislación vixente e protocolos esixidos.

Na difusión pública que se realice do proxecto obxecto deste convenio, consignarase expresamente a referencia ó IGCC e á FEGAMP como entidades que impulsan conxuntamente as actuacións que desenvolve este convenio.

O incumprimento total ou parcial de calquera das obrigas, condicións ou finalidades establecidas neste convenio, así como a falsidade comprobada en relación cos datos achegados para a súa obtención, orixinará, á vista da natureza e causas do incumprimento, a revogación ou o reintegro total ou parcial das cantidades percibidas xunto cos xuros de demora, nas condicións e de conformidade co establecido na Lei 9/2007, do 13 de xuño, de subvencións de Galicia.

Quinta.- Fiscalización e control.

O IGCC resérvase a facultade de realizar as comprobacións ou controis que considere necesarios, co propósito de asegurar o cumprimento das normas e requisitos cos que se concede a achega económica prevista no convenio. Así, tanto os beneficiarios, entidades colaboradoras e terceiros que sexan beneficiarios da achega que se contempla no convenio, estarán obrigados a prestar colaboración e a facilitar tanta documentación sexa requirida no exercicio das funcións de control que

corresponden á Intervención Xeral da Comunidade Autónoma, ou no seu caso, ao control realizado polo Consello de Contas e demais órganos competentes.

Sexta.- Comisión de Seguimento

Para a valoración global do grao de cumprimento do convenio, créase unha comisión de seguimento, de carácter paritaria, formada por dous representante do IGCC e dous da FEGAMP. A comisión deberá reunirse ao inicio da vixencia deste convenio, con carácter semanal e, en todo caso, sempre que o solicite unha das partes.

Os acordos adoptaranse por unanimidade. No caso de non existir esta unanimidade, o acordo terá a consideración de mero informe e elevarase ás autoridades que subscriben o convenio para a súa resolución.

Outras cuestións relativas ao réxime e funcionamento da comisión serán consensuadas no seu seno e, no non previsto, estarase ao disposto na Lei 39/2015, do 1 de outubro, do procedemento administrativo común das administracións públicas.

Son funcións desta comisión: velar polo cumprimento do convenio e adoptar ou propoñer as medidas necesarias para garantir o exercicio coordinado das competencias de cada unha das partes.

Sétima.- Vixencia e resolución.

O presente convenio entrará en vigor o día seguinte ao da súa sinatura, a súa vixencia rematará o 31 de decembro de 2018.

Non se contempla a posibilidade de prórroga da vixencia do convenio.

O convenio poderá resolverse cando concorra algunha das seguintes circunstancias:

Son causas de resolución do presente convenio:

- a. Incumprimento total ou parcial dalgunha das súas cláusulas.

- b. Transcurso do tempo estipulado sen que se leve a cabo o obxecto do mesmo.
- c. A denuncia de calquera das partes formulada por escrito con quince días de antelación. Neste suposto, unha vez comprobada a adecuada xustificación, serán aboados os gastos efectivamente realizados para o desenvolvemento da actividade obxecto do convenio
- d. Acordo mutuo das partes.

Toda alteración das condicións recollidas no presente convenio poderá dar lugar á súa modificación. A dita modificación formalizarase sempre mediante unha addenda.

En virtude da normativa vixente na Comunidade Autónoma de Galicia, este convenio poderá ser obxecto de modificación cando teñan como finalidade o logro dos obxectivos de estabilidade orzamentaria e sustentabilidade financeira. As devanditas modificacións terán por obxecto a redución do volume das obrigas ou a ampliación do seu prazo de execución.

Oitava.- Xustificación e pago das actuacións previstas.

Para cobrar a totalidade do importe do convenio, a FEGAMP deberá presentar a xustificación do mesmo antes do 15 de decembro de 2018, para o cal deberá remitir ó Instituto Galego do Consumo e da Competencia, segundo o establecido no artigo 9 do Decreto 193/2011, de 6 de outubro, polo que se regulan especialidades nas subvencións ás entidades locais galegas o seguinte:

- a).- Certificación expedida pola Secretaría da FEGAMP, co visto e praxe do/a presidente, relativa á aprobación polo órgano competente da conta xustificativa do convenio, na que se faga constar como mínimo, de forma detallada:
 - 1.- O cumprimento da finalidade do convenio
 - 2.- Os distintos conceptos e contías correspondentes ós gastos totais soportados pola entidade beneficiaria imputables á actuación do convenio coa seguinte relación: identificación do acredor, nº da factura ou documento

equivalente, importe, data emisión e data de recoñecemento da obrigação polo órgano competente. Non serán esixibles as facturas ou documentos de valor probatorio equivalentes no tráfico xurídico-mercantil ou con eficacia administrativa incorporados na relación á que se fai referencia, nin a súa documentación acreditativa do pago.

b).- Relación detallada doutros ingresos ou subvencións que financiasen a actividade obxecto do convenio con indicación do importe e orixe.

Así mesmo deberá completarse a xustificación do convenio co seguinte:

1. Unha memoria de actuación xustificativa do cumprimento das condicións impostas, con indicación das actividades realizadas e dos resultados obtidos.
2. Base de datos das OMICS da Comunidade Autónoma de Galicia cos seus datos identificativos.
3. Unha declaración responsable de estar ao día no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda coa Administración pública da comunidade autónoma.

Unha vez presentada esta documentación realizarase o pagamento do 100% do importe da achega.

Procederase a minorar a subvención concedida cando as actuacións desenvolvidas e xustificadas ao abeiro deste convenio teñan un custo inferior ao importe total, e sempre que esta minoración non supoña unha realización deficiente das actuacións.

Novena.- Non existencia de relación laboral.

A subscrición do convenio non leva consigo relación laboral, contractual ou de calquera outro tipo, entre os profesionais que vaian desenvolver as actividades e o IGCC, de tal xeito que non se lles poderá esixir responsabilidade ningunha, nin directa, nin indirecta ou subsidiaria polos actos ou feitos acaecidos no seu desenvolvemento.

Décima.- Publicidade.

En canto á publicidade, procederase de conformidade co mandato da Lei 1/2016, do 18 xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de Convenios da Xunta de Galicia e no Decreto 132/2006 do 27 de xullo, de creación dos rexistros de axudas, subvencións e convenios, e de sancións da Xunta de Galicia.

En virtude do disposto no parágrafo anterior a FEGAMP consente expresamente a inclusión e publicidade no devandito rexistro dos datos relevantes referidos ao convenio

Undécimo primeira. Protección de datos.

De acordo co Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas, no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos, DOUE do 4 de maio), as partes comprométense a non utilizar tales datos de carácter persoal con finalidade distinta á da execución do presente acordo, a non cedelos nin comunicalos baixo ningún concepto, e en especial a non reproducir, publicar ou difundir ningunha información acerca deles.

Cada parte responderás dos incumprimentos da normativa de protección de datos de carácter persoal nos que incorra.

Décimo segunda.- Natureza e Remisión normativa

O presente convenio ten natureza administrativa, quedando fóra do ámbito de aplicación da Lei 9/2017, do 8 de novembro, de Contratos do Sector Público, pola que se traspoñen ó ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014; sen prexuízo da aplicación dos principios e criterios da devandita Lei para resolver as dúbidas ou lagoas que puidesen presentar.

